



Bentiaraq Ottosen

UKA 2023/81

Atassut

19. oktober 2023

Takornariaqarnermik inuussutissarsiuqarnermi akuersissutinik tunniussisarneq qanoq pitsanngortissinnaaneripput aammalu taamatut tunniussisarneq nunatsinni takornarialerisunut naapertuuttumik ingerlanneqartarnersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Aqqalu C. Jerimiassen, Atassut)

Ullutsinni takornariaqartitsineq eqqartugaaqisoq aamma maani inersuarmit oqallisisassaqqilluinnarpoq. Ukiorpasuaanngortuni takornariaqartitsinerup annertusarnissaa, aningaasarsiorluarfissatullu neriuutigineqarnera soorlumi massakkut allatut nipilimmik sangujartortoq oqaatigineqarsinnaalerpoq.

Takornarianut tikilluaqquserpalaanngineq, takornarialerisunut asissuineq, immaqaluunniit oqaatigiinnarlugu namminersortuusunut usorunneq takussaalersimavoq. Pinngortitarsuarput takornariaqarnikkut nittarsaallugulu isumalluutigisarsimasarput, maanna inuit suaarutigisalerpaat takornarianiit aserorterneqalersoq, asuli angalaffigineqalersoq, kiisalu piniariarfinnut ajoqusersuiinnaleqqasut.

Aningaasaqarnikkut nunarput imminut pilersorsinnaanerulissappat takornariatitsineq siuarsartariaqarparput atorluarlugulu. Pikkorinneruinnartussaavugulli misissussallugu qanoq taanna pissanersoq, qanorlu iliorutta aningaasarsiorfigillualissanerlugu. Atassummiit takornariaqartitsineq tapersorsorparput, ukiullu arlaqalersuni Inatsisartut ataatsimiinneri tamakkialerpagut aningaasarsiorfissatut siunnersuuteqarfigisarlutigu.

Paasilluarparpullu siunnersuuteqartoq piniarfiit ataqqillugit, pinngortitarlu ataqqillugu takornariatitsinikkut periarfissat annertusarumallugit siunnersuuteqarmat. Tamannalu tapersersungarparput, takusinnaagatsigumi ullumikkutut nunaminertanik atuisinnaanermut periarfissaasut killeqartut, qinnuteqaasiortaraluartullu itigartinneqartartut tusarsaajuarlutik. Pingaartumillu nunaqqatigut takornariatitsinikkut siuarsarusukkaluartut.

Isumaqataangaarpugullu oqallissaarummi inatsit eqqaaneqartoq killilersuivallaartoq, tulluarsarneratigut ammaassinerusumik, atuisunullu suli allanut ataqqinnittumik suliareqqinneqarnissaanik siunertaqarmat.